

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 254440 24 St
Zenica, 14.07.2026. god.

Općinski sud u Zenici, sutkinja Marina Šapina, u stečajnom postupku nad stečajnim dužnikom Opća proizvodno-uslužna zadruga „GO! REVOLUCIJA“ p.o. Zenica, Londža 132, I/3, Zenica, odlučujući o prijedlogu privremenog stečajnog upravnika Senaudin Kulačić iz Zenice, nakon ročišta održanog dana 10.03.2026. godine, u prisustvu privremenog stečajnog upravitelja i zastupnika po zakonu predlagatelja direktora Kenana Kesića, van ročišta dana 14.07.2026. godine, donio je sljedeće:

R J E Š E N J E

Otvora se i zaključuje stečajni postupak nad stečajnim dužnikom društvom Opća proizvodno- uslužna zadruga „GO! REVOLUCIJA“ p.o. Zenica, Londža 132, I/3, Zenica, MBS: 43-05-0004-16, zbog nepostojanja stečajne mase, te se nalaže brisanje ovog privrednog subjekta iz sudskog registra zavedenog u reg. ul. broj: 43-05-0004-16, a po pravomoćnosti ovoga rješenja.

O b r a z l o ž e n j e

Prijedlogom od 03.05.2025.godine, predlagatelja „TORNADO“ d.o.o. Matuzići b.b.-DOBOJ JUG, Proizvodnja, promet i usluge, Matuzići b.b., Doboj Jug, zastupan zastupniku po punomoćnici Berini Bošnjak, odvjetnici iz Tešnja, pokrenut je stečajni postupak nad navedenim društvom.

Rješenjem ovoga suda br. 43 0 St 254440 24 St od 14.10..2025.. godine, pokrenut je prethodni postupak radi utvrđivanja uslova za otvaranje stečajnog postupka nad imovinom stečajnog dužnika 9 i za privremenog stečajnog upravnika imenovan je Senaudin Kulačić iz Zenice.

Na ročištu za ispitivanje uvjeta za otvaranje stečaja održanom dana 10.03.2026. godine, privremeni stečajni upravitelj je izjavio da ostaje u cjelosti kod Izvještaja od 08.01.2026. godine. Navodi da je Izvještaj urađen na temelju raspoložive dokumentacije iz sudskog spisa, finansijske dokumentacije koja mi je stavljena na uvid, informacija dobijenih od nadležnih registara, informacija dobijenih na održanim sastancima sa direktorom stečajnog dužnika, te neposrednim uvidom i obilaskom adrese koja je navedena kao sjedište stečajnog dužnika na adresi Londža 132 u Zenici. Prema Izjavi direktora g-dina Kesića radi se o stanu u vlasništvu Dževada Kesića. Prostorije su korištene bez nakande i bez ugovornog odnosa. Na adresi ne postoje oznake firme, niti bilo kakav trag da se tu nalazi registrovano pravno lice. Stečajni dužnik nema vlastito knjigovodstvo, niti zaključen ugovor sa nekom knjigovodstvenom agencijom za obavljanje računovodstvenih poslova.

Sukladno bilansu stanja društva koje je za 2019. i 2025. godinu dostavljeno u Finansijsko informatičku agenciju (FIA), Sarajevo navedeno je da društvo nema imovinu u Aktivi. Izjavljuje da je izvršio provjere u javnim i službenim evidencijama, te je Uvidom u Uvjerjenje Općinskog suda u Zenici Zemljišno-knjižni ured Zenica broj: 043-0-RZ-25-003 846, od 12.12.2025. godine, utvrdio da društvo nema evidentirano u zemljišnoj knjizi vlasništvo ili suvlasništvo nekretnina na području grada Zenice. Uvidom u Uvjerjenje Službe za imovinsko-pravne, geodetske i poslove nekretnina Grada Zenica, broj: 04-26-10-15209/25-2, od 11.12.2025. godine, utvrdio je da stečajni dužnik nije upisan kao nosilac prava u katastarskom operatu. Uvidom u Uvjerjenje MUP-a ZDK, Odsjek za administraciju, broj: 08-01-02/5-03-7-13131-1/25 KA, od 12.12.2025. godine, utvrdio je da stečajni dužnik ne posjeduje motorno ili priključno vozilo. Uvidom u Potvrdu Registra vrijednosnih papira u

Federaciji Bosne i Hercegovine, broj: 02-6-8796/25, od 10.12.2025. godine proizilazi da stečajni dužnik nije registriran kao vlasnik vrijednosnih papira. Od ostale imovine, prema Bilansu stanja iz 2019. Godine, društvo ima evidentiran iznos od 109 KM na blagajni, međuti u razgovoru sa direktorom, saznao je da se vjerovatno radi o nekim sredstvima blagajne koja su osnivači uplaćivali za izmirenje obaveza, ali u ovom trenutku fizički ne postoji i kao što je ranije navedeno u Izvještaju, nema sačuvane knjigovodstvene dokumentacije.

Sukladno svemu navedenom, a prema podacima i informacijama koji su dostavljeni privremenom stečajnom upravniku i uvidom u podatke iz javnih registara, izjavljuje da stečajni dužnik nema pokretne, nepokretne ili druge imovine.

Za utvrđivanje obaveza stečajnog dužnika izvršio je uvid u raspoložive poslovne knjige dužnika Bilans stanja na dan 31.12.2019. godine, 31.12.2025. godine, te Bilans uspjeha za 2019. i 2025. godinu, Uvjerenje Porezne Uprave FBiH, KPU Zenica, Porezna ispostava Zenica, broj: 13-4/1-45-1-2243/25 KTN, od 16.12.2025. godine i pregled rješenja prinudne naplate broj: 06-02-02-137-23737-2/25, od 25.12.2025. godine, izdatog od Bosna Bank International dd Sarajevo kao banke gdje društvo ima otvoren račun radi utvrđivanja visine dospjelih obaveza dužnika, te je konstatovao da privredno društvo sa danom pokretanja prethodnog stečajnog postupka radi utvrđivanja uslova za otvaranje postupka stečaja nad imovinom privrednog društva ima neizmirenih i dospjelih obaveza za plaćanja u iznosu od 5.521,66 KM sa tendencijom rasta. Uvidom u Bilans stanja na dan 31.12.2019. i 31.12.2025. godine, na kontu ostale kratkoročne finansijske obaveze evidentiran je iznos od 256 KM, a na kontu Dobavljači u zemlji evidentiran je iznos od 677 KM. Navodi da nije mogao utvrditi o kakvim dugovanjima se radi, jer nije imao uvid u analitičke kartice tih konta.

U dijelu izvještaja u kojem je utvrđivao razloge i uslove za otvaranje stečajnog postupka, izvršio je uvid u Izvještaj o računima poslovnog subjekta PS P3, izdatog od strane Jedinstvenog registra računa u BiH Centralne banke BiH na dan 11.12.2025. godine, dužnik ima otvoren transakcijski račun kod Bosna Bank International dd. Prema Pregledu rješenja prinudne naplate, broj: 06-02-02-137-23737-2/25, od 25.12.2025. godine, izdatog od Bosna Bank International dd Sarajevo, utvrdio sam da je glavni račun stečajnog dužnika na dan 25.12.2025. godine blokiran na iznos od 5.521,66 KM. Iz Izvještaja o računima poslovnog subjekta, može se vidjeti da je glavni račun dužnika blokiran dana 22.03.2021. godine, te imajući u vidu odredbe člana 6. stav (3) Zakona o stečaju, jasno proizilazi da postoje razlozi za otvaranje stečajnog postupka, jer je račun blokiran 60 dana neprekidno.

Navodi da je organ ovlašten za zastupanje stečajnog dužnika, podnio prijedlog za pokretanje stečajnog postupka dana 13.12.2024. godine, a uzimajući u obzir da je glavni račun dužnika blokiran 22.03.2021. godine, prijedlog za pokretanje stečajnog postupka podnesen je nakon isteka roka od 60 dana od dana nastupanja platežne nesposobnosti.

Na osnovu uvida u finansijsko stanje, dostupnu dokumentaciju i stanje imovine, utvrdio je da društvo nema nikakvu imovinu kojom bi moglo nastaviti poslovanje ili izmiriti obaveze, te smatram da nema uslova za nastavak poslovanja dužnika u cjelini ili djelimično u toku prethodnog postupka. Shodno naprijed navedenom, privremeni stečajni upravnik navodi da kod dužnika postoje razlozi za otvaranje stečajnog postupka iz člana 6. Zakona o stečaju – platežna nesposobnost dužnika, jer su računi blokirani 60 dana neprekidno, odnosno jer dužnik 60 dana neprekidno ne izmiruje svoje dospjele novčane obaveze, da dužnik, odnosno organ ovlašten za zastupanje dužnika nije podnio prijedlog za otvaranje stečajnog postupka u roku od 60 dana od dana nastupanja platežne nesposobnosti, dužnik ne posjeduje imovinu koja može pokriti troškove stečajnog postupka, da dužnik nema imovine koju bi obezbjeđivao i o kojoj bi se starao privremeni stečajni upravnik, da se poslovanje dužnika ne može nastaviti u cjelini, niti djelimično u toku prethodnog postupka.

Kako ne da ne postoji stečajna masa iz koje bi se namirivali troškovi stečajnog postupka, a društvo ima neizmirene obaveze, privremeni stečajni upravnik predlaže da sud pozove povjerioce i zainteresirana lica da u roku od 30 dana od dana objavljivanja poziva predlože otvaranje stečajnog postupka i uplate predujam za obezbjeđenje troškova stečajnog postupka u iznosu od 5.000,00 KM, na koji način bi se stekli razlozi za

otvaranje stečajnog postupka. Ukoliko povjerioci i zainteresirana lica u navedenom roku ne predlože otvaranje stečajnog postupka i ne uplate predujam, predlažem da stečajni sudija otvori stečajni postupak i odmah zaključi postupak nad imovinom društva Opća proizvodno uslužna zadruga "GO! REVOLUCIJA" p.o. Zenica, te po pravomoćnosti rješenja o zaključenju stečajnog postupka naredi brisanje ovog društva iz sudskog registra.

Zastupnik po zakonu predlagatelj navodi da ostaje kod prijedloga za otvaranje stečaja, da nema primjedbi ni pitanja na Izvještaj privremenog stečajnog upravitelja, te da je suglasan sa prijedlogom privremenog stečajnog upravitelja. Izjavljuje da se dati avansi na kontu 042 – Dati avansi u iznosu od 2.912 KM, i na Kontu 051 – Dati krediti u iznosu od 25.549 KM odnose na finansirane osnovnih potreba za poslovanje društva, npr. troškovi putovanja, noćenja, te reprezentacije, a koje su po savjetu računovođe društva uzimani kao pozajmnice iz sredstava društva i utrošeni su za poslovanje društva, za navedeno nema finansijske dokumentacije.

Zastupnik po zakonu predlagatelj izjavljuje da ostaje kod prijedloga za otvaranje stečaja, da nema primjedbi ni pitanja na Izvještaj privremenog stečajnog upravitelja, te da je suglasan sa prijedlogom privremenog stečajnog upravitelja.

Rješenjem od 10.03.2026. godine, sud je pozvao povjerioce i zainteresirana lica da u roku od 30 dana od dana objavljivanja poziva predlože otvaranje postupka i uplate predujam za obezbjeđenje troškova stečajnog postupka u iznosu od 5.000,00 KM, na depozitni račun ovoga suda.

Navedeno Rješenje je objavljeno na oglasnoj ploči suda dana 12.03.2026. godine, na web stranici suda i u „Službenim novinama Federacije BiH“ broj: 22/26 od 25.03.2026. godine.

Kako stečajni dužnik ima obaveze, dok nema imovine, pa ni za namirenje troškova stečajnog postupka, a povjerioci i zainteresirana lica u roku ostavljenom u rješenju donesenom od strane ovoga suda nisu predložili otvaranje stečajnog postupka niti predujmili novčani iznos potreban za pokrivanje troškova stečajnog postupka, to je primjenom odredbe člana 102. stav 8. Zakona o stečaju, odlučeno kao u izreci ovog rješenja.

Sukladno odredbi člana 108. i člana 204. stav 5. Zakona o stečaju, ovim rješenjem određen je upis rješenja o otvaranju i zaključenju stečajnog postupka koje usljed nedostatka mase prestaje postojati, te brisanje ovog pravnog lica iz sudskog registra.

Sutkinja:

POUKA O PRAVNOM LIJEKU

Protiv ovog rješenja može se izjaviti žalba
Kantonalnom sudu u Zenici u roku od 8 dana
od dana prijema, putem ovog suda. Žalba se dostavlja u
dovoljnom broju primjeraka za sud i protivnu stranku.

Marina Šapina